

thæum / Cap. 27. die ossa rediviva, wie sich die Gräber nach Christi Todt auffgethan / vnd viel Leiber der verstorbenen Heiligen wider lebendig worden / vnd nach Christi Auferstehung vielen erschienen seyn / wie dann alle Glaubige vnd Gottselige auch am Jüngsten Tag vnd in der Seligkeit einander erscheinen werden / vnd erfüllet werden wird / was Esa. <sup>Esa. 35.</sup> cap. 35. geschrieben hat: Die Erlöseten des Herods / werden <sup>Esa. 51.</sup> wider kommen / vnd gen Zion kommen mit jauchzen / ewige Frewde wird über ihrem Haupt seyn / Frewde vnd Bonne wird sie ergreifen / vnd schmerzen vnd seuffzen wird von ihnen fliehen / vnd weg müssen.

Zum dreyzehenden / wie auch das Jahrwerck / es sey gleich **XIII.** Tag oder Nacht bald ablaufft / wanns schon ganz vnd gar ist auffgezogen worden: Also laufft auch vnser Leben von der ersten Stund vnserer Empfängnuß / Geburt vnd Jugendt / vnd dann auch vnser ganzes Lebens bald dahin / ist bald auß / vnd sind wir abgelauffen. Dannenhero dann Moyses / Psal. 90. vnser Leben einer Nachtwache vergleicht / welche bey den Alten wird seyn gewesen / als Matth. 14. vnd Marci am 6. Christus selbst sagt. Wie nun / wann die Stunde fürüber / der Wachtmeister in Städten vnd im Feldlager die Soldaten von der Wacht ablösen thut. Also sagt auch David in diesem Psalm: Gott lasse vnns Menschen dahin fahren / er halte vns nicht auff. Item / Wir vergehen / wir müssen plötzlich davon / vnd dahin / vnser Tage fliehen dahin / vnd vnser Leben fahre schnell dahin / als flögen wir davon. Job / vergleicht vnser Leben einer Weberspuel / vnd sagt: Meine Tage sind leichter dahin geflogen denn ein Weberspuel / sie sind vergangen / daß kein auffhalten da gewesen ist. Als wolte Job sagen: Ach / wie geschwindt ist die zeit meines Lebens herumergelauffen / ehe ich mich habe recht umbgesehen / ist die zeit dahin gewesen / nicht anderst dann wie ein Weberschifflein mit